

V 9  
5812





Ex. 193. (8)

AK 193

Eine Christliche Predige

1 Theof. 4

Vg  
5812

**U**ber der Leich vnd Begräb-  
nus / Weiland des Ehrwürdigen / Achte-  
barn vnd Hochgelarten Herrn D. Mar-  
tini Lutheri, Seeliger Gedechnis

Durch Herrn

**J**ohan Bugenhagen Pomern D. vnd  
Professor zu Wittenberg gethan.

So auff anhalten vieler gutherzigen Christen  
in Druck gegeben.



BIBLIOTHEC  
PONICEAVIAN


A.  
UNIVERSITÄT-BIBLIOTHEK  
HALLE  
(SALE)

Wittenberg /  
In Verlegung Paul Helwigens.  
Anno M. DCV.

*Handwritten note at the bottom of the page.*



Faint, illegible text, likely bleed-through from the reverse side of the page.



Faint, illegible text at the bottom of the page, likely bleed-through from the reverse side.



Eine Christliche Predigt/  
 Über der Leich vnd Begrebnis des Ehrn-  
 würdigen Herrn D. Martini Luthers / durch  
 Herrn Johan Bugenhagen Pomern / Doctor vnd  
 Pfarherr zu Wittenberg  
 gethan.

Paulus der heilige APOSTEL 1. Thessal. 4. saget.

**W**ir wollen euch aber / lieben Brü-  
 der / nicht verhalten / von denen die  
 da schlaffen / Muss das ihr nicht trawrig  
 seid / wie die ander die keine hoffnung ha-  
 ben. Denn so wir glauben / das Jesus  
 gestorben vnd auferstanden ist / Also  
 wird Gott auch / die da entschlaffen sind  
 durch Jesum / mit ihm führen.

**I**eben Freunde / Ich sol iht vnd wil gerne  
 bey dem Begrebnis / vnsers hertzlieben  
 Vaters / D. Martini seligen eine Pre-  
 digt thun / Was aber / oder wie sol ich reden / so  
 ich für weinen nicht wol kan ein wort machen  
 Vnd wer sol euch trösten / So ich wer Pfarherr  
 vnd Prediger nit reden kan? Wo hin kan ich mich

von euch wenden? Ich werde on zweivel mit mei-  
 ner rede mehr heulens vnnnd trawrens machen/  
 Denn wie solten wir nicht alle hertzlich trawren/  
 So Gott ons dis betrubnis zu geschickt / vnnnd den  
 hohen thewren Man/den Ehrwürdigen: D. Mar-  
 tinum Luther/von ons weggenomen / durch wel-  
 chen er ons allen / vnnnd allen Kirchen Christi in  
 Deudschen Landen/auch vielen in frembden Na-  
 tionen/vnauß sprechliche gaben vnd gnade erzei-  
 get hat durch welchen er auch herrlich obgesieget  
 hat/wider das Reich des Satans/wider so manch-  
 erley schendliche Abgötterey vnnnd Menschen sa-  
 hung/Ja wie es Paulus nennet / wider die Teu-  
 fels leren in aller Welt/Vnnnd hat ons offenbaret  
 im Euangelio / das hohe / grosse / Himlische Ge-  
 heimnis / seinen lieben Son Ihesum Christum  
 (wie es zum Ephesern vnd Collossern S. Paulus  
 auch nennet (durch welchen vnsern lieben Vater/  
 Christus sein Euangelium verteidiget hat /wider  
 de leidigē Bapst/vnd mancherley Kotten vnd Ty-  
 rannē/ Ja wider alle pfortē der Helle/welchē thew-  
 re Man er gegeben hat de Geist der krafft vñ stercke/  
 das er niemand schewete/ wie gros vnd mechtig er  
 were / vnd also freidig ob dem Euangelio vnd rei-  
 utzere hie/das er offte dafur angeschē ward/  
 von der Welt/ als were er mit straffen vnd scheltē

zu scharff/ vnd thet im zu viel/ Wie auch die Jüden  
vnd Phariseeer / die bittern vnd giftigen Ottern /  
Christo schuld gaben / Denn es schmercket sie v-  
bel/ vnd that ihnen wehe/ das sie gestrafft wür-  
den/ durch die lautere warheit/ Aber die heilsame  
Lere namen sie gleichwol nicht an.

Diesen hohen Lehrer vnd Propheten/ vnd von  
Gott gesandten Reformatorn der Kirch / hat vns  
Gott weggenommen / Ach wie können wir das  
trauren vnd weinen lassen? Wie können wir  
doch dem lieben Paulo hie gehorchen/ da er saget/  
Ir solt nicht trawrig sein/ ober denen die da schlaf-  
fen? Aber er setzt gleichwol dazu/ Wie die andern  
die keine hoffnung haben/ Wir aber/ die wir glau-  
ben/ wissen/ das die da entschlaffen sind in Chri-  
sto/ wieder zu einem bessern leben erweckt werden/  
da wir widerumb werden mit ihnen zusamen ko-  
men / vnd ewig bey einander sein.

Aber die Welt ist nicht werth gewesen / das  
sie diesen thewren Man Gottes/ lenger haben solt/  
weiter ihn zu lestern vnd zuverfolgen / Wiewol  
doch dieselbe vnd anckbare Welt/ auch viel gutes/  
durch diesen hohen Man empfangen hat / beson-  
dern darin / das sie erlöset ist / von so mancherley  
beschwerung vnd Tyranney des leidigen Paps-  
thumbs/ Also / das viel von Widersachern (bey  
A iij  
welchen

welchen noch etwas weisheit oder verstand ist) lieber wolten / der tewre Man / hette noch lange sollen leben.

Dies habe ich zum eingange gesagt / das wir ja grosse ursache haben / herzlich zu trawren / die weil wir ein solchen hohen tewren Man verloren haben. Vnd warlich (so das etwas helffen mag) Es trawren mit vns / Christliche Könige / Fürsten / vnd Stedte / vnd alle die da erkant haben das Evangelium der warheit / Darumb trawren wir ja nicht alleine / Sondern viel tausent hin vnd wider / in der Christenheit mit vns. Es hat dem leidigen itzigen Papst / Cardinal / Meinz / oder H. Heinrich / nit gebüren mögen / ober den tod dieses Mannes (welche er alle mit der warheit / hefftig erzürnet hat) sich je zu freuen. Vnd ich hoffe / die Widersacher sollē sich nicht lange ober seinem tod freuen / Den die person ist wol in Christo verschieden / Aber gewaltige / selige / Göttliche lehre / dieses tewren Mannes / lebet noch auffß aller sterckste.

Denner war one zweiffel der Engel / davon in Apocalypsi. xiiij. cap. stehet / der da geflogen hat / mitten durch den Himmel / vnd hatte ein Ewig Evangelium etc. Wie denn der Text saget.

Vnd ich sahe einen Engel fliegen mitten durch den Himmel der hatte ein ewig Evangelium zu verkün-

verkündigen denen/die auff Erden sitzen vnd wonen/vnd allen Heyden/vnd Geschlechtern vnd sprach/vnd Völkern/Vnd sprach mit lauter stimme/Fürchtet Gott/vnd gebet im die ehre/denn die zeit seines gerichtß ist kommen/vnd betet an den/der gemacht hat Himmel vnd Erden/vnd Meer/vnd die Wasserbrunnen. Vnd ein andere Engel folget nach/der sprach/Sie ist gefallen/sie ist gefallen/Babylon die grosse Stad/denn sie hat mit dem Wein irer Hurerey getrencket alle Heyden.

Dieser Engel/der da saget/Fürchtet Gott/vnd gebet im die Ehre/war D. Martinus Luther/vnd das hie stehet/Fürchtet Gott/vnd gebet im die Ehre/das sind dir zwen stücke der lere D. Martini Luthers/das Gesetz vnd Euangelium/durch welche die ganze Schrift geöffnet wird/vnd Christus erkand wird vnser Gerechtigkeit vnd ewiges leben/Zu welchen zweenen er auch dis stücke hinzu gesetzt hat (die zeit seines gerichtß ist kommen) Vnd hat geleret vom rechten Gebet vnd Anruffung gegen Gott dem Himlischen Vater/im Geiße vnd der Wahrheit/Wie der Engel Apoc. 14. auch saget/betet an/den/der da gemacht hat Himmel vnd Erden/etc.

Denn nach der Lere dieses Engels/wird folgen ein ander Engel/Welcher trost wird predigen

der

der betrübten vnd angefochten Kirchen/ vnd ober die Widersacher/ Blitz vnd Donner/ ewiges Gerichts vnd verdammis/ Wie denn der ander Engel sprach/ Sie ist gefallen/ sie ist gefallen/ Babylon die grosse Stad. Darumb werden die Widersacher von diesem vnserm betrübnis/ nit lange sich frewen/ Wie auch Christus saget/ Johan. 16. Ewer betrübnis sol zur freude werden / Denn dem Apocalypsi nach/ im gemelten 14. Cap sehen wir/ dz das vorher gangen ist/ vnd noch gehet/ Sol Apocalypsis etwas sein / so wird one zweivel dz ander folgen.

Aber/ Ah/ wie lauffe ich so weit/ mit meiner rede/ in diesem vnserm weinen vnd betrübnis? Dis sey gnug von vnserm billichen trawren geredt/ Denn wir trawren ja billich/ dz ein solcher thewrer Man/ rechter Bischoff vnd Seelenhirte/ von vns gescheiden / Aber in diesem betrübnis sollen wir auch billich erkennen Gottes güte vnd barmherzigkeit gegen vns / vnd Gott danken / das er nach hundert jaren/ von dem tode des heiligen Johannis Hus (welcher vmb der warheit willen getödtet ist / Anno 1415. (balde vns erwecket hat/ durch seine Geist/ diesen thewre Doctorem Martinum Lutherum/ wider die Antichristischen Lehre des leidigen Satanschen Papsts/ vnd wider die

Teufels

Teuffels leren / wie denn Johannes Hus / von  
 einem künfftigen Schwane / selbst geprophecet /  
 hat / vor seinem tode / Denn Hus / heist auff Bö-  
 hemisch eine Gans / Ihr bratet (saget Johan Hus)  
 jzt ein Gans / Gott wird aber einen Schwan er-  
 wecken / den werdet ihr nicht brennen noch braten.  
 Vnd da sie wider ihn viel schriben / das er ihnen  
 nicht könte antworten / sol er gesagt haben / Nach  
 hundert jaren wil ich euch antworten / Das hat  
 er redlich gethan / durch vnsern lieben Vater D.  
 Lutherum / vnd eben angefangen / im folgende jar  
 nach hundert jaren. Ja / wir sollen Gott dancken /  
 das er den tewren Man / vns erhalten hat / vnd  
 seiner Kirchē / in den hefftigen streitē / in so viel har-  
 ten kempffen / vnd dz durch ihn Christus so offft  
 obgesieget hat / nu fast bis in die xxx. jar / Dem  
 Herrn Christo sey lob vnd Ehre in ewigkeit / Amē.

Wir sollen vns aber auch mit vnsern liebe Va-  
 ter Luthero freuen / dz er also / in dem höchsten A-  
 postel vnd Propheten ampt / in welchem er seinen  
 befehl / erewlich ausgericht / hin vnd von vns ge-  
 gangen / vnd abgeschieden ist / zu dem Herrn Chri-  
 sto / da den sint die heiligen Patriarchen / Prophe-  
 ten / Apostel / vñ viele / denē er dz Evangelii gepre-  
 diget hat / alle heilige Engel / Lazarus im schoß A-  
 brabe / dz ist / in der ewigen freude aller gleubigen /

V

Wu

Wie das ilt zu gehe / bis auff den Jüngsten tag / das werden wir erfahren / wie Paulus sagt zum Phillip. am 1. Ich habe lust abzuscheyden / vnd bey Christo zu sein / wie in den Geschichten der Aposteln auch Stephanus sagt / HERR Jesu / nimm auff zu dir meinen Geist / vñ Christus zum Schezher / Heute wirstu mit mir im Paradiß sein.

Denn es hat keinen zweifel / wie der Geist Christi war in den henden des Vaters / da er gesagt hat / Vater / in deine hende befehl ich meinen Geist / etc. bis zu der Auferstehung am Ostertage / Also werden unsere Geister / in den Henden Christi sein / bis zu vnser Auferstehung / Den also lauten die wort von Lazaro / Izt aber wird er getröstet / Du aber wirst gequelet.

Was mitler zeit / bis an Jünsten tag / die Gleubigen für eine ruge / oder trost haben / oder die Gottlosen für eine vnruhe oder qual / das können wir aus der Schrift nit so eben sagen / Die Schrift saget / sie schlaffen / wie Paulus saget zum Thessal. Von denen die da schlaffen. Gleich aber / wie in natürlichen schlaffe / die gesunden in einem süßen schlaffe rugen / vnd dadurch erquicket / stercker vnd gesünder werde / Die vngesundē aber / oder die betrübte / vñ söderlich die in todß schrecken oder furcht sind / schwerlich mit schrecklichen

lichen treumen vnd unrüzig schlaffen / also / das  
 inen der schlaff nicht eine ruge / sondern ein schreck-  
 lichere / wüstere vnruhe ist / denn dz wachen / also ist  
 ein vnterschied / zwischē der Gleubigen vñ Gottlo-  
 sen schlaff / aber hie von können wir nit weiter reden  
 oder schliessen / denn wie der Schrifft wort lauten.

Vnser lieber Vater D. Martinus Luther / hat  
 nu erlanget / dz er offte begert hat / Vñ wen er izt  
 wider zu vns solte komen / so würde er vnser traw-  
 ren vnd zagen straffen / mit dem wort Christi / Jo-  
 han. 16. So jr mich lieb hettet / würdet jr euch  
 freuen / denn ich gehe zu Vater / Vnd würdet mir  
 gūnen die ewige ruge vñ freude / Christus hat den  
 tod für vns überwunden / Was zagen wir denn ?  
 Der tod des leibes ist vns ein anfang des ewigen  
 lebens / durch Jesum Christum vnsern HErrn / der  
 für vns / ein edel thewer opffer worden ist.

Ich gedencke noch / wenn der Ehrwürdige / vn-  
 ser lieber Vater D. Martinus Luther / etliche sa-  
 he süßiglich entschlaffen / im bekentnis Christi / dz er  
 sprach / gebe mir Gott / dz ich auch so süßiglich ent-  
 schlaffen möge / im Schoß Christi / vnd nit mit lan-  
 gen todes schmerzen der leib gequelet werde /  
 Doch geschehe Gottes willen.

Hie bey vns zu Wittenberg in der Vniuersitet /  
 war Magister Ambrosius Bernhardus von Gū-

terbock / mein lieber Bruder / ein recht frommer  
 Man / welcher Christum lieb hatte / Der lag etliche  
 tage für seinem ende sehr schwach vnd krank / bis  
 in den tod / vnd Gott benam im doch das fülen der  
 krankheit / als ob er schon in einem andern leben  
 were gewesen / redet mit vns / wie er wolte zu vns  
 komen / vnd mit vns frölich sein / Das er so krank  
 war / vnd sterbē muste / davon wuste er gar nichts /  
 Er sahe gewis den tod nit / darumb kundte er nit  
 für dem tode erschrecken / Ja er war nicht mehr in  
 diesem leben / on allein / wenn man von Christo re-  
 det / so bekennet er frey von hertzen die grosse gnade  
 vnd seligkeit / die vns vom Himlischen Vater in  
 Christo widerfahren ist / Denn er hatte Christum  
 lieb vnd pflag gerne zu beten / vnd Gott den Va-  
 ter anzuruffen im Geist vnd Warheit. Wenn man  
 im den (als einem der zu sich selbs gekommen war)  
 balde darauff wolte sagen von seinem geliebten  
 Weibe / Kindern / Hause / Geld / Schuld / etc. So  
 war er wider bald nicht bey sich selbs / sondern als  
 in einer andern Welt (doch kaudte er vns alle / vnd  
 nennete vns mit namen) redet frölich / mit lachen  
 vnd lieblichen scherzen von andern dingen / also / dz  
 einer / der seine Phantasey nicht wuste / gedenccken  
 möchte / er were gar gesund / vnd müste sonst für die  
 lange weile in Bette ligen / etc. Aber vnser lieber

Herr

Herr Jesus Christus/nam in aus diesem leben zu  
 sich/in solcher Phantasey / aber doch in guter be-  
 kenntnis des Christlichen glaubens/also/dz er schon  
 tod war dieser Welt/etliche tage zuvor/ehe denn er  
 starb/Denn er wuste gar nichts auff Erden/dafür  
 er sorgen möchte / Ja es war ihm alles aus dem  
 herzen genommen/Das er auch seine Kranckheit  
 nicht fülete/bekümmerte sich nichts omb den tod/  
 Ja er sahe auch den todt nicht/wie solte er den für  
 der Sünde vnd für dem tode erschrecken? Also/das  
 wir in im fur augen sahen/dz wort Christi Joh. 8.  
 welches allen Christgleubigen widersehret / So  
 jemand mein Wort wird halten / der wird den tod  
 nit sehen ewiglich. Denn ob sie nicht alle so leicht  
 dahinsterven/als dieser Ambrosius / sondern mit  
 großem schmerzen/wie der Son Gottes selbst am  
 Creuze starb/Doch wenn dz liebe stündlin komet/  
 so sehen sie dz leben/vnd nicht den tod/vnd sprechē  
 alle/Vater/in deine Hende befehle ich meinē Geist/  
 wie denn vnsern herzlichē Vater Doctorem Mar-  
 tinum/vnser lieber Herr Jesus Christus/mit sol-  
 chem seligen abschide aus diesem jammerthal / zu  
 sich genomē hat/Gott sey lob vñ danck in ewigkeit.

In der franckheit Magistri Ambrosij da ich  
 sahe/das er auch nicht schlieff/bat ich zween Do-  
 ctores Medicinæ,sie wolten ihm einen starcken

B iij

Schlaff.

Schlafftrunck zurichten / Die antworten mir /  
 Solchs were sehrlich / vnd man möchte inen die  
 schuld geben / so es vbel geriete / Ich sprach / ich wil  
 verantworten / wenn er auch schon darüber bleibē  
 würde / Gebets ihm ein im namen Gottes / als ei-  
 nem desperato, Wer weis / es möchte helffen / Sol-  
 chen tranck gaben im die Medic, aber mit so starck  
 wie ich begerete / den sie besorgeten sich etwas / da  
 kam ihm der Schlaff mit gewalt / das er bey zwo  
 stunden schlieff. Aber da er auffwachete / fülete er  
 seine wehe / vnd klagete darüber / vnd redet mit sei-  
 nem Weibe / von allerley notsachen / verstendiglich /  
 Aber bald darnach / vhn gefehrlich nach anderhal-  
 ber stunde / war er wider in seinem frölichen wesen /  
 wie zuvor / wuste nit mehr von dieser Welt / bis dz  
 er nach etlichen tagen / Christo den geist auffgab.

Solche selige vnd fröliche Historia / von Magi-  
 stro Ambrolio / vnserm lieben Bruder / habe ich ikt  
 gerne gesagt / vmb zweierley vrsachen willen / Zum  
 ersten / das ich ewer liebe damit ein wenig möchte  
 auffhalten / von dem heulen vnd weinen / welchs  
 vns nu billich angekomen ist / Gott hat vns betrü-  
 bet / seine gnade tröste vns wider. Zum andern / dz  
 solche Historia dienet zu vnser sachen / da wir ikt  
 von reden.

Dem dieser Magister Ambrosius / war Docto-

ris

ris Martini Schwager/darumb besucht er in offte  
in seiner krankheit / Vnd wenn er von Christo  
mit im redet / so redet Ambrosius auch von  
Christo/nach dem lieben Euangelio/wie gesagt/a-  
ber wenn er mit im wolte reden/vom Weibe/Kin-  
dern/Gütern/etc. So wuste Ambrosius nichts vō  
solchē sachē/sondern phantasiret balde frölich mit  
andern wortē/wie zuvor gesagt/Besondern saget  
er mit lachē vñ dancksagen dē Doctor/Herr Doc-  
tor/danck habet/dz jr zu mir komē seid/Ich wil wi-  
derumb zu euch komen/ auff den abend einmal/da  
sollen wir zusammen gute Collation halten/vñ ich  
wil den von vielen frölichen sachen mit euch reden.  
Zwar/ist mögē sie beide solchs außrichten im ewi-  
gen leben/da sie beide hingerisset sind/ In diese le-  
ben haben sie auff die weise nit mögen zu sammen  
kommen.

Da nu Doctor Martinus von im gieng/sprach  
der Doctor zu mir/Der ist dahin/er weis von kei-  
nē tode/Weñ wir im rathen wollen/wie er seine sa-  
che sol bestellen/so weis er nit mehr vō dieser Welt  
vnd leben/Sondern ist frölich/lachet/schleget vns  
ander ding für mit seiner frölichen phantasey/spot-  
tet vnser noch dazu mit solchen Worten/ als wolte  
er sagen/Ich weis nichts mehr auff Erden zu be-  
stellen oder zu besorgen/Gott gebe mir doch auch

kurz

16  
 kurz solche stille vnd selige tods stunde / Was soll  
 ich mehr auff Erden machen?

Dann Magister Ambrosius im harten Wint-  
 ter begraben war / Anno M. D. XLii. Mense Ja-  
 nuario / gieng nicht lange darnach Doctor Mar-  
 tinus mit mir für dem grabe vber / Da weiset er  
 mit der Hand auff's grab / vnd sprach / Der wuste  
 nicht das er krank war / Er wuste auch nicht das  
 er starb / vnd war doch nicht on bekentnis Christi /  
 Da ligt er / er weis noch nicht / das er tod ist / Lie-  
 ber Herr Jesu Christe / nim mich auch also aus  
 diesem jammerthal zu dir etc.

Solchs musste ich oft von meinem liebe Vater  
 hören / Vnd wenn er meinen vnwillen mercket / zu  
 zeiten auch wol aus meinen worten / so sprach er  
 zu mir / Bittet doch vnsern lieben Herrn Gott / dz  
 er mich kurz vñ hinne zu sich neme / Ich kan nichts  
 mehr thun auff Erden / Ich bin euch nichts mehr  
 nütze / Helfft mir mit ewerm gebet / Bittet mit / dz  
 ich lenger lebe. Nu kan ein iglicher wol geducken /  
 was ich meinem lieben Vater / vnserm herzlichem  
 Doctor auff solche wort geantwortet habe. Dz al-  
 les zeigt an / wie gern er dieses jamerlebens / in sei-  
 nen letzten tagen / wolte loß sein / vnd mit Christo  
 sein / Damit hat er auch sein Consumatum est / ge-  
 sungen / vnd dem Himlischen Vater seinen Geist in

die

die Hende befohlen. Es sind auch vorgehende anzeigung gewesen/das vnser lieber Vater/Doctor Martinus/in ein besser leben wandern würde/Denn dis ganze Jahr durch/hat er zu vns gesaget/er begere an einen andern orth zu ziehen/In auch öfter in diesem Jahr/vor seinem tode außgezogen/denn zuuor in vielen Jahren/nemlich in sein Vaterland gen Mansfeld/zum Bischoffe gen Zeitz/gen Mersburg/gen Halle. Dis sind gleiche anzeigung vnd Propheeyung gewesen/dz er diese selige Reise würde thū in ein besser leben / Daher hat sichs auch begeben/das er bey den Edlen vnd Wolgebornen Graffen vnd Herrn zu Mansfeld in der Stad Eizleben/da er gebore vnd getaufft/ aus diesem leben abgescheiden vnd gereiset ist/ nit anders denn wie ers begert hat / außgenommen/ das er die zeit lieber hette wollen bey vns seinem lieben Weibe vnd Kindern sein./ Aber Gott hats anders geschickt.

Das jr aber auch einen kurzen bericht habt lieben Freunde von vnserm herzlichem Vaters Doctoris Martini seligem abschiede/da er mercket/dz seine stunde komen were/hat er also gebetet.

Mein Himlischer Vater/ein Gott vnd Vater vnserm HErrn Jesu Christi/du Gott alles trostes/ich dancke dir/das du mir deinen lieben Son

G

Jesum

Jesum Christum offenbaret hast/an den ich gley-  
 be/den ich geprediget vnd bekandt habe/welchen  
 der leidige Pappst vñ alle Gottlosen schenden/ver-  
 folgen vnd lestern/Ich bitte dich mein Herr Jesu  
 Christe/las dir mein Seelichen befohlen sein. O  
 Himlischer Vater/ob ich schon diesem leib lassen/  
 vnd aus diesem leben hinweg gerissen werde mus/  
 So weis ich doch gewis/dz ich bey dir ewig bleibe/  
 vnd aus deinen Hende mich niemands reißen kan.

Vnd folgend hat er drey mal gesaget/ In deine  
 Hende befehl ich meinen Geist/Du hast mich erlö-  
 set/du trewer Gott.

Item / Johannis 3.

Also hat Gott die Welt geliebet/ dz er seine ein-  
 gornen Son gab/auff das alle die an in gleyben/  
 nit sollen verloren werden/sondern das ewige le-  
 ben haben.

Vnd hat also seine Hende gefalten/vnd in seiner  
 stille/seinen Geist Christo auffgegeben/Darumb  
 sollen wir vns billich mit im freuen/so viel wir für  
 trawren künden.

Hemus ich gedenccken / des heiligen Bischoffs  
 S. Martini/von welchem die Historia sagt / dz  
 alle Kezer erblasien vñ erbleichten für seinem na-  
 men/Item/das ein gros weinen vnd trawren ge-  
 wesen ist/aller gleybigen vnd rechten Christen / v-

ber

ber den tod S. Martini/ Item/ das ein disputiren  
 vnd hader worden ist/ vnter etlichen Stedten vnd  
 Landen/ welche den Leib S. Martini solten be-  
 halten/ vnd bey sich begraben. Dis alles hat sich  
 gleicher gestalt / bey diesem heiligen Apostel vnd  
 Propheten Christi / vnserm Prediger vnd Evan-  
 gelisten/ in Deudschen Lande D. Martino zuge-  
 tragē/ aber da von wil ich nit nach der lenge reden/  
 Gott hat in nu selbs werth vnd lieb/ vnd erhebt in  
 in seinem schoß/ der in diesem leben / vns vnd die  
 Kirchen Christi/ sehr lieb gehabt / Vergelte es vn-  
 serm lieben Vater/ Gott in jenem leben/ Da wir  
 alle auch hoffen zu im zu komen.

Gebē Gott/ das auch auff die nachkomen/ der  
 Geist Gottes/ zweimal mehr zu reden sey/ denn der  
 hohe reure Man geredt hat / vnd in der Kirchen/  
 die der liebe Vater gepflanzt hat / Wie denn der  
 Prophet Elisa von dem Elia bitet / da er von dem  
 Elia/ in einem wetter hinweg genommen ward.

So wir aber fürchten oder gedencen/ das Gott  
 den theuren Mann/ vmb vnser Sünde vnd vn-  
 danckbarkeit willen weg genommen hat / So sollen  
 wir vnser leben bessern/ durch Christum Gott vn-  
 sern Himlischen Vater herzlich anruffen/ das wir  
 bleiben mögen in der seiligen reine Lere/ vom glau-  
 ben/ vnd beschützet werden durch Christum/ wider

die

19. 5812. 67

die Kotten vnd Tyrannen/vnd wider alle pforten  
der Hellen/Be schirm HERR Christe / deine ar-  
me Christenheit / das sie dich loben in ewigkeit / Hilff  
vns Gott vnser Heiland / errette vns vmb der Eh-  
re willen deines namens vnd sey gnedig vnsern  
Sünden / vmb deines heiligen Namens willen /  
Erhalte in deiner Kirchen / trewe vnd gute Predi-  
ger / Gibe denselbigen krafft vnd stercke / durch den  
heiligen Geist / Wie der 68. Psalm sagt / Der HERR  
gibt das Wort / mit grossen scharen Evangeli-  
sten.

Die vnverschampten / grewlichen grossen leste-  
rungen der Widersacher / vnd der verstockten Pfaf-  
fen vnd Mönche / vñ dazu auch vnser vndanckbar-  
keit / künde wol nu sein in der Welt / gros vn-  
glücks / vnd straffe Gottes / vrsache / Aber wir sol-  
le bitten Gott den Vater im namen des Sohns /  
vnser HERRN Jesu Christi / dz er vmb seines Na-  
mens willen / thū wolle / vnd erfüllen vnd war wa-  
chen / dz Epitaphiū vnd Prophecey / welches in vn-  
ser lieber Vater D. Martinus selbst gemacht hat.

Pestis eram vivus, moriens tua mors ero Papa.

Das ist auff Deutsch / Papst / Papst / Da ich lebete / da war ich  
deine Pestilenz / Wenn ich sterbe / so wil dir dein bitter tod sein.

Gott sey gelobt in ewigkeit durch Jesum Chri-  
stum vnser HERRN / Amen.

Last vns beten / etc.

m.c.



ten  
ar  
ilff  
h  
rn  
n/  
die  
en  
rr  
li  
  
ie  
af  
ar  
on  
ol  
s/  
la  
na  
on  
at.  
pa.  
r ich

Pou Vg 5812, QK

ULB Halle 3  
003 552 136  


f

W 17





AK. 193. (8)  
AK 193


**S**ber der  
nus/ Weila  
barn vnd S  
tini L

**J**ohan Buc  
Professo  
Iho auff a



In B

7. 1. 15



Vg  
5812

rab-  
Acht

vnd

BIBLIOTHEC  
PONICKAVIAN

UNIVERSITÄT-BIBLIOTHEK  
HALLE  
(SAALE)